



8 - 21 no fepuare

N° 64

RATA HAATI

I TE MAU RAUTI E PATOI NEI I TE MAU OHIPA
ATOMI I ROTO I TE MOANA PATIFITA

Ia ora na. I te mau matahiti atoà e faatupu te mau fenua atoà no te moana Patifita i te hoê oroa haamanaoraa no te patoiraa ia i te mau ohipa atomi atoà mai te tamatamataraa atomi, te faarueraa viivii atomi, te heruraa repo atomi, te matini atomi horoa uira... e te vai atura.

I roto i ta'na rururaa no te 30 no Tenuare ua faaoti te tomita faatere o IA MANA TE NUNAA i te aratai te faanahoraa i teie nei matahiti 1982, e ere ra no na anaè no te taatoà ra.

No reira e ta ù taeae, teie te tarena i feruri amui hia e te tomita :

- 1 - Faatupu i te hoê poroterua i te mahana maa 27 no Fepuare i te hora 7 e te afa i te poipoi.
- 2 - Faarevaraa : te aua o te fare oire no Papeete.
- 3 - Aveia : te matete e te aorai o te Tomitera Teitei.
- 4 - Oreroraa parau i te matete i nià i te tumu parau no te atomi.
- 5 - Vaihoraa i te aorai o te Tomitera Teitei i te hoê rata aniraa ia tapeahia te paura atomi.
- 6 - Faahoi na tatahi.
- 7 - Faataaêraa i te aua o te fare oire no Papeete.

Te ani nei te tomita faatere ia oe ia amui mai e tae noa'tu i ta oe utuafare e te mau hoa atoà ia faaite pāpū tātou i to tātou hinaaro i te vaiho i te hoê oraraa oaoa no ta tātou huaai.

A faaitoito mai, e ohipa teie no te taatoà e na te taatoà. Tera tu a te poroi no te aroha e mauruuru no to oe amui raa mai.

Ia ora na

NO TE HOE HAU MANAHUNE

UA HAAVĀHIA TE OHIPA RUDY - TOOFA

Ua tae atu i roto outou te parau no Rudy e o Toofa, ua faaroo hoi outou i te huru o te tupuraa teie ohipa i Pueu, a pēpē ai te tamaiti a Toofa i te ofai pupuhi.

Ua tupu te haavāraa i teie ohipa i te fenua nei i te omuaraa o te avaē Tenuare.

Ua faaorehia te hara eiarāa puāa toro, e aufau ra o Toofa 579 490 farane no te mau matini e te mau tauihāa huru rau o ta'na i ore i faahoi ia Rudy.

Ua faaorehia te utuā a Rudy no nia i te tumu ohipa o te tapeāraa i te moihāa pupuhi ma te parau faatia ore. E aufau noa o Rudy i te hoē tino moni 50 000 farane ei utua no te horoāraa i te pupuhi i roto i te rima o te hoē o ta'na rave ohipa. E aufau atoā o Rudy i te tino moni ra 300 000 farane no te utuuturaa i te tamaiti a Toofa.

Te tumu o teie fifi aita i haavāhia, a ite ai tatou o vai ra tei eiā i te puāa toro. Te tupu noa nei ā te huru haavaraa ia manuia te feia ona. Na roto i te veā N° 36 a IA MANA TE NUNAA e ite ai outou i te huru o parau o te aitarahuraa fenua i rotopu ia Toofa e o Rudy i reira ia outou e papū ai o vai tei eiahia

UA TOPA TE MONI HOO O TE PAUHI "GAZ"

Eiaha ra ia parau i te oaoa rahi, 12 farane te toparaa, e api rahi to tātou, e mea rahi tera toparaa. Eiaha na e ata oioi, e tia i te poipoi ae.

I te poipoi ae, e parau api, *ia topa te moni hoo i teie mahana, a hio maitai i to ananahi.* Mai te opupū ra teie huru ohipa, ia nenei oe i teie pae, e oru te tahi pae.

Inaha, ua maraa te moni hoo o te mori i te faito 2 toata i te ritera. E parau vetahi ē, ua api tātou.

E numera anaē na tātou.

moni gaz :	1 989 farane - iriti na 12 farane	=	1 977 farane
moni mori :	1989 farane e 27 ia ritera mori, e roaa i teie tino moni		
	te maraaraa 2 farane tatai 27	=	54 farane

ua topa mai	12 farane
ua maraa	54 farane
ua tavirihia oe	42 farane

mea marū roa te ohipa a te feia ra, e putaputa rii maite noa.